



SAOPĆENJE ZA JAVNOST

Istraga o pokušaja ubistva policajca Ponovo produžen pritvor osumnjičenom

(Brčko, 12.8.2024. godine)

Na prijedlog Tužilaštva, Osnovni sud Brčko distrikta BiH donio je odluku o produženju pritvora za još jedan mjesec S. M. (33)*, koji je osumnjičen da je šestog juna u Brčkom pucanjem iz pištolja pokušao lišiti života policijskog službenika J. T. Usljed opasnosti da bi mogao ponoviti ili dovršiti pokušano krivično djelo, za koje se može izreći kazna zatvora tri godine ili teža kazna, njemu je pritvor produžen do šestog septembra.

Tužilaštvo i Policija Brčko distrikta BiH intenzivno sprovode istragu protiv S. M. zbog sumnje da je 6. juna oko 02,30 časova u ulici Mostarska, ispred ugostiteljskog objekta *Belvedere*, pucanjem iz pištolja pokušao lišiti života J. T. Kako se navodi u naredbi o sprovođenju istrage, nakon što su prethodnog dana u večernjim satima zajedno sjedili u navedenom objektu, njih dvojica su se odvezli na brčanski carinski terminal gdje su pred prijateljem E. T. započeli verbalni sukob. Nakon toga, E. T. je osumnjičenog povezao do objekta *Belvedere*, dok ih je oštećeni pratio i sustigao na parking u tom objektu gdje su nastavili verbalni sukob. Zatim je osumnjičeni, dok se J. T. nalazio u automobilu, iz svog vozila uzeo pištolj i, svjestan da ga može lišiti života, iz neposredne blizine ispalio sedam hitaca prema njemu. Kako se zaključuje u naredbi, on je oštećenog pogodio u lijevu nadlakticu, nanijevši mu tešku tjelesnu povredu, i na više mjesta oštetio vozilo u kojem se nalazio J. T., nakon čega se s trećim licem odvezao s lica mjesta.

Pošto je ubrzo lociran i uhapšen, njemu je na prijedlog Tužilaštva određen jednomjesečni pritvor zbog opasnosti da bi boravkom na slobodi mogao ponoviti ili dovršiti pokušano krivično djelo, za koje se može izreći kazna zatvora tri godine ili teža kazna. Uz tužilačku i sudsku ocjenu da i dalje postoje okolnosti zbog kojih mu je pritvor određen, trajanje ove mjere najprije mu je produženo za mjesec, zaključno sa šestim avgustom. Ovih dana, prije njenog isteka, trajanje ove mjere za uspješno vođenje krivičnog postupka iz istovjetnih razloga dalje mu je produženo do šestog septembra, novom sudskom odlukom koja je u međuvremenu postala pravosnažna. Uz njegovo zadržavanje u pritvoru, Tužilaštvo i Policija neodložno nastavljaju daljnje procesuiranje S.M. u okviru istrage usmjerene na dokazivanje krivičnih djela ubistva, u pokušaju (iz člana 163 Krivičnog zakona Brčko distrikta) i nedozvoljenog držanja oružja ili eksplozivnih materija (iz člana 365 Krivičnog zakona).

*Ovom objavom ne prejudicira se ishod krivičnog postupka i ne narušava princip presumpcije nevinosti. Svako se smatra nevinim dok se pravosnažnom presudom ne utvrdi njegova krivica.

GLAVNI TUŽILAC

ZEKERIJA MUJKANović